

# JEMS

## Kipihac wê Jems kivuu ge

---

**1** <sup>1</sup>A Jems, a ga Anutu yuu Apumtau Yesu Kilisi nu yuac a, om a kivuu kipihac tiga i loc vô xam Islele wê xam pum lec Jekop nue vigê yuu di tô mi la yuu ge, léc gwêbaga xam sea bom di toto loc dô vac tibii vîyang ba ben. A nêl vidiiên vô xam.

### Viyin i vông xovôên vô il

<sup>2</sup>Xam lige, buc wê xam obêc tulec viyin ya ge od xam nilôm i o léc vô viyin lêm. Nge, xam nilôm i nivîha, <sup>3</sup>di xam vyac xovô bê viyin tigege tulec xam nêb ob yaxên xam nêm vông vinên, léc wê xam obêc vông i vin Anutu xêkizêc ge od xam obêc le pilihi mi dô. <sup>4</sup>Om xam le pilihi vac viyin mi dô i tiyi lec buc vihati, êdêc i vô nivîha vô xam di vông xam tu xomxo wê nivîha lee i tiyi wê xam ob timu vô Anutu kiyang vihati ge.

### Xomxo ti piyôp obêc myabo ge od i kitaa vô Anutu

<sup>5</sup>Xam ti piyôp obêc myabo ge od i kitaa vô Anutu bê Anutu i vông piyôp nivîha vô i, ge od Anutu obêc vông vô i. Ên Anutu ge wê ob vông susu vô xomxo vihati ge di ob kol ên xomxo ti di kunac i lêm. <sup>6</sup>Léc xomxo ti obêc kitaa ge, od i vông i vin xêkizêc, di nilô i o léc vông yuu lêm. Ên xomxo ti wê nilô vông yuu ge tiyi xocbê gwec wê lea vivêê di i vô myapilôhê pileva ge. <sup>7</sup>Om xomxo tibêge i o léc so bê Apumtau ob vông susu ti vô i lêm, <sup>8</sup>ên xomxo tibêge mi xo kiyang tibeac di o timu vô môp tibed lêm.

### Xomxo wê nên susu maên gee yuu xomxo wê susu tibeac gee

<sup>9</sup>Lige vông vinên wê nên susu maên ge, he i dô hixôn xêyaa nivîha, ên wê Anutu hêm he lec nivîha ge. <sup>10</sup>Di lige vông vinên wê susu tibeac ge, he i dô hixôn xêyaa nivîha ên wê he susu tibeac lê, léc he tiyi xocbê xomxo pileva ge. Ên xomxo wê susu tibeac gee obêc yib tiyi xocbê nita maviya wê vuac ge, <sup>11</sup>léc hiyôv obêc linac myapilîhi ge od ya i ngigo di

maviya nivihā tyo ob yal la vêl di i yib. Om xomxo wê susu tibeac gee obêc vông yuac lec mi dô lê, lêc buc wê obêc yib ge od ob sea yuac yuu susu vihati obêc dô xel, di ob yib mi la pileva.

### Susu wê ob yaxên xomxo ge

<sup>12</sup>Xomxo ti obêc le pilihi vac viyin ge od i xêyaa i vô nivihā, ên Anutu obêc pimil i di vông i dô maviha luta tiyi xocbê hilu kiyang pyap nêb ob vông vô xomxo wê he xêyaa vin lec i ge. <sup>13</sup>Lêc xomxo ti nilô obêc kidu i nêb i vông soên ti ge od i o lêc nêl bê Anutu didii i vac nipaên tige lêm. Ên nipaên ti o tiyi wê ob yaxên Anutu ge lêm, di Anutu ob didii xomxo ti vac nipaên lêm. <sup>14</sup>Lêc yaxên tige kehe yêp vac il toto nilôd, om kidu il nêb il vông môp soên. <sup>15</sup>Nang dêc nipaên wê yêp vac il nilôd ge vô nôn lec di vông il vac nipaên. Om nipaên obêc vô levac ge od nôn bêga nêbê il obêc xib di la xôa ma timuên.

<sup>16</sup>Om xam lige, le i lêc vông i vin kiyang kityooên wê nêl ên nêbê Anutu ob didii il vac nipaên ge lêm. <sup>17</sup>Ên vizid yuu susu nivihaviha vihati lam gê lag puunê. Ge Mag Anutu vaci vông i lam vô il. Anutu ge xêseac kehe, di ob pilepac i xocbê hiyôv yuu dentuc ge lêm. Nge, i xêseac kehe wê obêc dô luta. <sup>18</sup>Anutu vaci xovô nêb ob vông il tu i nue om vông il vô paha lec ya kiyang nôn wê i vông ge. Anutu vông bêge, ên nêb il tu i nue mugên wê il luu susu vihati wê i tung ge vêl.

### Il ob ngô Anutu vya di timu vô

<sup>19</sup>Xam lige, xam vyac xovô môp bêga bê xam vihati ngô kiyang mi xovô nivihā lê, di le i lêc nêl kiyang lec lutibed lêm, di le i lêc kunacma decdec lêm. <sup>20</sup>Ên xêyaa myavinê wê xomxo vông ge ob vông môp nivihā wê Anutu vông ge i vô nôn lec lêm. <sup>21</sup>Om xam sea môp nipaên yuu judajuda wê yêp vac xam nilôm ge, di xam loc vac Anutu kwa ngibi di hôm kiyang wê Anutu vông mi i yêp vac xam nilôm ge xôn. Ên kiyang tige tiyi wê obêc vô xam vêl ên nipaên di vông xam lax vô Anutu.

<sup>22</sup>Om xam timu vô Anutu kiyang vihati di xam o lêc ngô pileva lêm. Ên xam obêc ngô pileva ge od xam kityoo xam. <sup>23</sup>Ên xomxo ti obêc ngô Anutu kiyang lê, lêc ngô pileva di o timu vô lêm ge, od ge tiyi xocbê xomxo ti yê manôn vac deac ge. <sup>24</sup>Yê manôn vac deac pyap lêc la ge od o xovô manôn wê yê vac deac ge lêm. <sup>25</sup>Anutu xolac nivihā ge wê piwelac il vêl ên nipaên wê ku il xôn ge, om xomxo ti obêc xovô xolac tige nivihā mi timu vô, di o ngô pileva di lungên lêm ge, od xomxo tige obêc dô hixôn xêyaa nivihā tiyi lec buc vihati.

<sup>26</sup>Xomxo ti obêc xo nêbê i xomxo nivihā ên wê mi vông lilo di mi kitaa vô Anutu ge, lêc o viac mya nivihā lêm ge od kityoo i di vông lilo yuu kitaa ge pisiv. <sup>27</sup>Xomxo vông vinên nêb môp wê Mag Anutu ob yê nivihā ge bêga nêbê il ob ngidu pibua yuu vêxôv wê dô vac viyin ge xôn, di il ob viac il nivihā êdêc môp kibun ga i o lêc vông il vô nipaên lêm.

### Il ob xê xomxo vihati i tiyima

**2** <sup>1</sup>Xam lige, xam vông i vin Apumtau Yesu Kilisi, wê il nêd levac di xêseac kehe ge, om xam o lêc hôm xomxo wê lê levac ge lec di vô nimim vô xomxo wê nêd susu maên ge lêm. <sup>2</sup>Ên obêc tiyi xocbê xam kitucma mi dô lê, lêc xomxo yuu miloc vô xam, xomxo ngwe ob miloc hixôn ngakwi yuu vunac vunac niviha, di ngwe ob miloc hixôn nêd ngakwi nipaên. <sup>3</sup>Mêd xam obêc hôm ngwe wê ngakwi niviha ge lec di nêl vô i bêga bê, “Lam dô lec sia niviha tiga,” di nêl vô xomxo susu maên ngweo bêga bê, “Ông loc le ganê, mad lam dô nêd vô a vixag ga.” <sup>4</sup>Xam obêc vông bêge ge od ge xam yaxên xomxo ya piyôp soên wê xam vông ge mi wê xomxo ya niviha di wê ya nipaên.

<sup>5</sup>Xam lige, xam ngô lê. Xomxo wê susu maên gê kibun ga ge wê Anutu vinoo he pyap nêb he i tu xomxo wê vông vinên xêkizêc ge, di nêl nêb he ge wê ob la dô vac i ben lag puunê di kô vizid niviha wê Anutu hilu pyap nêb ob vông vô xomxo wê he xêyaa vin lec i ge. <sup>6</sup>Om bêna lêc xam vông xomxo wê susu maên ge vô nipaên mi dô hixôn ni yocênê? Xam xovô ên xam nêbê viyin lam gê na vô xamê? Xam xovô bê xomxo wê susu tibeac yuu mone levac ge wê mi vông viyin vô xam di kô xam mi la vac kot ge. <sup>7</sup>Xam vông i vin Yesu lê di tu i nue, lêc xomxo wê mone levac ge wê mi so vya vô lê niviha tige, lêc bêna lêc xam kô he lecê?

<sup>8</sup>Il Apumtau Anutu nêl kiyang ti mi i yêp vac xolac bêga ên nêbê, “Ông xêmyaa i vin lec xomxo baba ge i tiyi xocbê ông xêmyaa vin lec ôcông va ge.” Om xam obêc timu vô kiyang tige ge od xam vông môt niviha mêgê. <sup>9</sup>Lêc xam obêc hôm xomxo mangwe lec mi pimil he di wê mangwe nipaên ge od xam vông ge so, di xolac nêl xam nêd kitong nêbê xam vông nipaên. <sup>10</sup>Ên xomxo ti obêc timu vô xolac vihati niviha, lêc vông bo ti la tiyiên ma ge od tiyi xocbê pwoolac vihati ge vac. <sup>11</sup>Ên Anutu nêl bêga nêbê, “Xam o lêc vông yôdac vêx yuu vux lêm,” di nêl hixôn ên nêbê, “Xam o lêc hi xomxo i yib lêm.” Om yôdac vêx yuu vux obêc ma, lêc ông hi xomxo ti yib ge od ông vông xolac vihati vô nipaên. <sup>12</sup>Om xam vyaac xovô di vông môt yuu kiyang vihati i tiyi xocbê kiyang wê yêp vac Anutu xolac ge. Ên xolac tige wê piwelac il vêl ên nipaên di vông il lôm dô vac niviha ge, om buc timuên Anutu obêc yaxên il nêd môt lec xolac tige. <sup>13</sup>Mêgem xomxo ti obêc xo vîgwe pişiv ên xomxo baba lêm ge od Anutu obêc xo vîgwe pişiv ên xomxo tibêge lec buc wê ob titô il nêd kiyang ge lêm. Lêc xomxo wê xo vîgwe pişiv ên xomxo baba ge, ge wê obêc la dô niviha vô buc wê Anutu ob titô il nêd kiyang ge.

### Vông vinên nôn yuu vông vinên mayibên

<sup>14</sup>Xam lige, xomxo ti obêc nêb i xomxo vông vinên, lêc o vông môt niviha hixôn lêm ge od i nêd vông vinên ge, mya nêl pişeva di o tiyi wê

ob vô i vêl ên nipaên di vông i dô vac niviha ge lêm. <sup>15</sup>Xam lime wê ngakwi yuu yaên ma ge ti obêc miloc vô xam, <sup>16</sup>lêc xam ti obêc nêl vô i bêga bê, “Loc hixôn xêmyaa niviha, di vinyum ngakwi lec ên lea di wa yaên ên i den ông.” Xam obêc nêl bêge, lêc xam obêc vông yaên yuu ngakwi wê ob ngidu i ninivi xôn ge lêm ge od kiyang tige ob vô niviha vô i tibêna? <sup>17</sup>Il nêd môm vông vinên tiyi bêge. Ên vông vinên wê il vông ge obêc vông môm niviha ti lêm ge od il nêd vông vinên ge mayibên.

<sup>18</sup>Lêc xomxo ti mêd obêc nêl bêga bê, “A ga wê a vông i vin di ông ge wê ông mi vông môm niviha.” Lêc a ob nêl vô i bêga bê, “Ông nêb ông vông i vin lê, lêc ông o vông môm niviha ti hixôn lêm. Om ông nêb vông vinên ob yêp seac mi xe xê tibêna? Dom a ga, a vông i vin nôn, om môm niviha wê a mi vông ge nêl vông vinên wê a vông ge kitong seac.” <sup>19</sup>Ông vông i vin ên ông nêbê Anutu tived. Ge niviha lê, lêcom vimwo nipaên êno vông i vin kiyang tige di xona mabu, lêc he o tu Anutu nue lêm.

<sup>20</sup>Ông ge piyôp maên, ên ông vông i vin pileva di ông o vông môm niviha hixôn lêm, om ông nêb vông vinên ge mayibên di nôn ma. Lêc mêd ông nêb a nêl kiyang tige kehe kitong vô ông, om ông ngô lê. <sup>21</sup>Ilage il bug Eblaham vông nu Aisak tu daa vô Anutu tiyi xocbê Anutu nêl vô i ge, om Anutu yê môm wê i vông ge nêb i xomxo niviha. <sup>22</sup>Om ông xovô bêga bê Eblaham vông i vin Anutu di vông môm niviha hixôn, om môm niviha wê ivông ge vông i nêb vông vinên vô nôn lec. <sup>23</sup>Mêgem kiyang wê yêp vac xolac ge vô nôn lec bêga nêbê, “Eblaham vông i vin Anutu om Anutu yê vông vinên wê i vông ge di nêl nêbê i xomxo niviha.” Di Anutu yê Eblaham nêbê i nu wê yuu xêyaa vin lecma ge. <sup>24</sup>Om il ob xovô bêga bê Anutu ob yê nêbê xomxo ti niviha lec vông vinên pileva lêm. Nge, Anutu obêc yê nôn niviha wê yêp seac vac vông vinên wê i vông ge od ob nêl bê i xomxo vông vinên nôn.

<sup>25</sup>Tiyi xocbê môm wê vêx yôdac Lehap vông ge. Ên xomxo yuu wê Josua vông yuu la ên nêb yuu loc yê vîgwe ge, Lehap viac yuu niviha di vông yuu lax mi la môm bangwe mi la, om Anutu yê vêx tige niviha lec yuac wê i vông ge. <sup>26</sup>Om il ob xovô bêga bê xomxo ti obêc vông i vin ya mya pileva di o vông môm niviha hixôn lêm ge od vông vinên wê i vông ge mayibên, tiyi xocbê xomxo ninivi wê myakilôhô la vêl di ninivi vaci yêp ge.

### Il ob viac myad i niviha

**3** <sup>1</sup>Xam lige, xam o lêc nêl bê xam tibeac ob tu xomxo xolac nêlên lêm, ên il xovô bê buc timuên wê Anutu obêc titô il nêd kiyang ge od obêc pilii xe wê xomxo xolac nêlên ge, xe nêb kiyang lê, lêc vông myaviwen nipaên vô xe luu xomxo baba vêl. <sup>2</sup>Il vihati mi vông môm soên, lêc xomxo ti obêc nêl kiyang niviha di ti soên ma ge od xomxo tibêge niviha yang, tiyi wê ob viac i ninivi yuu môm vihati niviha êno ge. <sup>3</sup>Xam

xovô lê. Il obêc tung ain nipwo tya vac xôhô mya ge od il ob pop xôhô nôn levac tige ya susu nipwo tya gedi i la bôbac vô môm wê il nêb il ob la vô ge. <sup>4</sup>Di xam xovô lec sip êno. Sip ge susu mabu yocên lê, léc obêc le pileva ge od lea obêc kô mi la vac gwec. Di sip stia ge susu nipwo tya lê, léc xomxo ti wê mi kô sip ge obêc hôm lec mi ngibina ge od sip la bôbac vô môm ti wê nêb ob la vô ge. <sup>5</sup>Di get êno bêge. Il get ge nipwo tya, léc yong i tiyi xocbê susu levac ti.

Di xam xovô lec ngwax. Ên ngwax nipwo tya tiyi wê ob ya nagyi levac ma vêl. <sup>6</sup>Di il get ge tiyi xocbê ngwax. Ên il get wê dô vac il myad ge keac kiyang nipaên tibeac di vông il nidnivi vihati vô nipaên. Seten vaci vông nipaên vac il get, mêgem tum mahelac xocbê ngwax ge lec il nêd môm di ya i vô nipaên. <sup>7</sup>Xomxo tiyi wê ob kô bwoc vimen yuu menac di myel yuu lilii wê dô vac nita di dô vac mia ge viyang viyang di vông he vô malehe lec ge, om xomxo mi vông bêge. <sup>8</sup>Léc xomxo ti o tiyi wê ici va ob vông get vô malehe lec ge lêm. Ên il get mi nêl kiyang nipaên vaxvax tibeac om nipaên tige la vông xomxo nilô vuac di hibû sea. <sup>9</sup>Il pîmil Mag Apumtau ya il get lê, nang dèc il get so vya vô xomxo wê Anutu tung he tiyi ici va kinu ge. <sup>10</sup>Om kiyang yuu lam vac il myad tibeac. Ngwe, il pîmil Anutu, di ngwe, kiyang nipaên. Xam lige, môm bêge tiyiên ma vêl. <sup>11</sup>Mia numên yuu mia gwec, yuu xôn o pîtuv vac maliyuhu tibeac lêm. <sup>12</sup>Xam lige, kwacsung mêd tiyi wê ob vuac nôn hîguc ge, me? Me xeb tiyi wê ob vô nôn xocbê gulac nôn ge, me? Ma vêl. Di gwec êno o tiyi wê ob pilepac mia numên ge lêm. Om xam xovô bêga bê xomxo wê kiyang nipaên yêp vac i nilô ge od ob nêl kiyang nipaên, dom xomxo wê kiyang nivîha yêp vac i nilô ge od ob nêl kiyang nivîha.

### **Piyôp yuu xovôên nivîha lam vô Anutu**

<sup>13</sup>Xomxo wê piyôp yuu xovôên nivîha ge od i léc tup vô môm nivîha di i o léc yong i lêm, êdêc xomxo i yê di xovô bê i xomxo xovôên nôn. <sup>14</sup>Léc xam obêc dô hixôn nilôm nipaên vô xomxo ya di xam obêc xovô nêbê xam ob vông i tiyi wê xam nilôm xovô ge ên i vô nivîha vô xacxam va ge, od xam o léc yong xam bê xam piyôp levac lêm, ên ge xam pwoo kiyang nôn di nêl kiyang kityooên. <sup>15</sup>Ên xovôên tibêge o lam gê lag puunê vô Anutu lêm. Nge, ge nipaên kibun ga wê xomxo nilô xovô di Seten vaci tu kehe ge. <sup>16</sup>Ên xomxo obêc dô hixôn nilô nipaên vô xomxo ya, di obêc xovô nêbê he ob vông i tiyi wê he nilô xovô ge ên i vô nivîha vô heche va ge od he ob dô vac nivîha ti lêm. Nge, he ob dô vac viyin di nipaên viyang viyang obêc hivun he xôn. <sup>17</sup>Léc xomxo wê kô xovôên nivîha vô Anutu ge od ob vông môm bêga bê nipaên ti o yêp vac he nilô lêm, di he dô vac malehe, di he lum nêl kiyang voma, di he vô nînya lehe vô lie kiyang, di he xo viḡwe pisiv ên xomxo di vông môm nivîha vô he, di he vông môm nivîha vô xomxo vihati tiyima, di he vông i vin nôn di o nêl ya

mya pileva lêm. <sup>18</sup>Di xomxo wê nêl kiyang malehe vô lie ên nêb he xôn ob dô hixôn xêyaa nivîha ge, ge tiyi xocbê he xin vê vac yuac om vê tige obêc tyip mi vô nôn nivîha.

**Xomxo wê xêyaa vin lec susu kibun ga ge vông vevac vô Anutu**

**4** <sup>1</sup>Xame, xam kunacma di nêl kiyang vevac voma ên va? Kehe bêga bê xam nêl nêlôm ngaên vông xam nim nyag voma di xam kunacma di hima lec. <sup>2</sup>Ên xam xêmyaa vin lec susu vîyang vîyang gee ên xam nêb xam ob kô lê, léc xam kôên ma, om xam nêbê xam ob hi xomxo i yib lec. Di xam do mam vô susu vîyang vîyang gee, léc tiyiên ma wê xam ob kô ge, om xam kunacma di hima lec. Xam o kô susu wê xam nêb xam ob kô ge lêm, di kehe bêga bê xam o mi kitaa vô Anutu lec susu tige lêm. <sup>3</sup>Léc buc ya xam kitaa vô Anutu ên xam nêb i vông susu vô xam lê, léc Anutu vôngên ma, ên xam o kitaa i la nivîha lêm. Nge, xam kitaa ên xam nêb Anutu i vông susu wê ob vô nivîha vô xaxam va ge. <sup>4</sup>Xam ge wê xam sea Anutu xolac ge mêge. Ên xomxo xêyaa obêc vin lec susu yuu môp kibun ga ge, od ge tiyi xocbê he vông vevac vô Anutu ge, léc mêd xam lungên tige, me? Ga a nêl vô xam ên a nêbê xomxo ti obêc vông nilô la vô susu kibun ga ge od tiyi xocbê vông vevac vô Anutu. <sup>5</sup>Ên kiyang yêp vac xolac bêga nêbê, “Il kinud wê Anutu tung vac il nilôd ge, Anutu yê xôn nêb il vông i loc diluhu vô ici va.” Kiyang nêl bêge, léc xam mêd xo ên xam nêb Anutu nêl kiyang ga kityooên vô xam, me?

<sup>6</sup>Léc Anutu xêyaa vin lec il luu vêl om nêb ob ngidu il xôn, tiyi xocbê kiyang wê yêp vac xolac bêga ên nêbê, “Xomxo wê yong he vô Anutu ge, od Anutu obêc ngiloo he vêl. Léc xomxo wê vông he vô nipwo lec di la vac Anutu kwa ngibi ge, od Anutu obêc xo vigwe pisiv ên he di ngidu he xôn.” <sup>7</sup>Om xam pilepac xam di loc vac Anutu kwa ngibi. Di xam le pilihi di tii Seten ên i pec vêl ên xam. <sup>8</sup>Xam loc kwabo vô Anutu, ên xam obêc la kwabo vô Anutu ge od Anutu êno ob lam kwabo vô xam. Léc xam ge tibii nipaên, om xam pilepac nilôm i vô paha lec i tiyi xocbê xomxo lipac vigê vô paha lec ge. Xam nilôm ge vông yuu, om xam sea vilu wê nipaên ge di vông nilôm yuu piyôp i loc diluhu vô Anutu. <sup>9</sup>Di xam nilôm i vô vîyin di xam byag ên nêl nipaên lê. Gwêbaga xam nap hixôn xêmyaa nivîha, lêcom xam pilepac nilôm napên di byag hixôn nilôm vîyin ên nêl nipaên wê xam vông ge lê. <sup>10</sup>Xam pilepac xam vô Apumtau manôn, ên xam obêc vông bêge ge od Apumtau obêc hêm xam lec di vông lê levac vô xam.

**Il ob so vyad vô lige ngwe lêm**

<sup>11</sup>Xam lige, xam o léc so vyam vô lime vông vinên lêm. Ên xomxo ti obêc so vya vô li ngwe, me yaxên i nêb i xomxo nipaên ti ge od ge tiyi xocbê so vya vô xolac di yaxên nêbê xolac ge nipaên. Di xam obêc yaxên

xolac bêge ge od xam o timu vô xolac lêm. Nge, xam dô tiyi xocbê xomxo wê nêb ob yaxên xolac mi yê bêc nivîha me nipaên ge. <sup>12</sup>Lêc Anutu tîbed wê tu xolac kehe ge di i tîbed wê ob yaxên xomxo ge. Om Anutu tiyi wê ob hôm xomxo lec, di i tiyi wê ob kitya xomxo vêl ge. Lêc xam letya wê xam nêb xam ob yaxên lime ge?

<sup>13</sup>Xam ngô lê. Xam ya yong xam di nêl ên xam nêbê, “Gwêba me titige od xe ob la vac vigwe levac tiganê, ên la dô klîsmas ti di vông yuac bisnis ên kô mone levac lec.” Lêc a ob nêl vô xam bê <sup>14</sup>xam o xovô susu wê ob val vô xam titige lêm. Di buc wê xam ob dô mamviha ge, od xam ob dô bêna? Ge xam lungên, ên xam dô ge tiyi xocbê ngwaxlu wê ob didii loc myabo tya di xôa ma lutibed ge. <sup>15</sup>Om xam lêc nêl kiyang ngwe bêga bê, “Apumtau obêc tyuc lec nêb il dô madviha di vông yuac ngwe ga me ngwe ganê ge, od il ob vông.” Xam obêc nêl ngwe bêge od obêc nivîha. <sup>16</sup>Lêcom xam yong xam di pimil xam, lêc kiyang tîbêge nipaên. <sup>17</sup>Om xam xovô lê. Xomxo ti obêc xovô môp nivîha wê Anutu nêb il vông ge lê, lêc vôngên ma ge od i nên so.

### Xomxo wê mone yuu susu tîbeac gee

**5** <sup>1</sup>Xam wê mone levac yuu susu tîbeac gee, xam ngô di xovô viyin wê obêc val vô xam ge lê, di xam byag di iac ên xam lê. <sup>2</sup>Susu vihati wê xam vông ge pital sea, di xam nêm vînyumên vihati ge, mun yuu gwaakivac kitov sea. <sup>3</sup>Di xam nêm mone gol yuu silva ge, guva iac sea, om guva tige obêc nêl xam nêm nipaên kitong, di myavinê obêc ya xam nimnivi tiyi xocbê ngwax ya ge. Ên xam kituc susu yuu mone tîbeac dô, lêc buc tîmuên wê xam ob kô myaviwen lec ge vô kwabo lec. <sup>4</sup>Xam ngô lê. Xomxo wê vông yuac vô xam lec yaên gee, xam mi kityoo he ya mone nipwo tya di hôm viwen xôn. Om he nên mone wê dô vô xam ge nêl xam nêm nipaên kitong, di xêkizêc kehe Apumtau ngô xam nêm soên wê nume yuac tîgee nêl ge. <sup>5</sup>Tiyi buc vihati wê xam dô kibun ga, xam kô susu nivîhaviha tîbeac di dô hixôn xêmyaa nivîha, di xam vet nilôm ya yaên mi i pup lec, lêc buc wê myaviwen ob kitya xam vêl ge vô kwabo lec pyap. <sup>6</sup>Xam mi vông kot vô xomxo nivîha mi hi he yib, lêc he o hi xam di vông myaviwen ti lôc vô xam lêm.

### Il ob le pîlihi vac viyin di dô bin Apumtau

<sup>7</sup>Om xam lige vông vinên, xam le pîlihi vac viyin di dô bin buc wê Apumtau obêc lop mi lôm ge. Il xovô ên il nêbê xomxo wê vông yuac yaên ge nêb ob kô yaên nôn om dô bin buc wê lun ob tô lec yaên tige ên nêb i vô nôn nivîha. <sup>8</sup>Om xam le pîlihi di dô bin Apumtau êno bêge. Di xam vông i vin xêkizêc ta mi dô, ên buc wê Apumtau obêc lôm ge vô kwabo lec.

<sup>9</sup>Xam lige, xam o lêc kunac lime di so vyam vô he lêm, êdêc kô myaviwen nipaên lec lêm. Ên xomxo ti wê obêc yaxên il nêd kiyang

timuên ge val le kwabo pyap. <sup>10</sup>Xam lige, xam xovô plopete môp ilage wê he nêl xolac lec Apumtau lê di tibii le vông viyin levac vô he, lêc he le xêkizêc di kilê viyin. Mêgem xam kilê viyin mi timu vô he vixa xocbê he kilê ge. <sup>11</sup>Ên il mi nêl ên il nêbê xomxo wê le xêkizêc vac viyin gee, he ob dô hixôn xêyaa nivîha. Xam xovô Jop kiyang pyap wê nêl ên nêbê Jop le pilihi vac viyin viyang viyang wê tulec i ge, di timuên Apumtau vông môp nivîha vô Jop tii vac, ên Apumtau ge wê xo vigwe pisiv ên il vihati om ob ngidu il xôn.

### **Il ob nêl bê il nêl kiyang nôn lag puunê lêm**

<sup>12</sup>Xam lige, a ob nêl kiyang levac ti vô xam mi xam ngô lê. Kiyang bêga bê xam ti obêc nêl kiyang ti ge od xam o lêc nêl lag puunê me kibun me susu ti lê hixôn ên i ngidu ông kiyang xôn lêm. Nge, xam obêc lee yuu lec xomxo ngwe kiyang ge od xam nêl myabo bê “ngee”, ge od pyap. Lêc ma ge od xam nêl bêga bê “ma”, ge od pyap. Xam nêl bêge êdêc myaviwen nipaên i o lêc lôm lec xam lêm.

### **Kitaaên wê xomxo vông vinên vông ge xêkizêc**

<sup>13</sup>Xam lime ti obêc tulec viyin ge od i kitaa vô Anutu lê. Me xam ti xêmyaa obêc vô nivîha ge od i vông lilo vô Anutu hixôn pimilên. <sup>14</sup>Lêc xam ti obêc vông yidac ge od i nêl gyovixa i lam, ên he i lam lipac wel lec i ninivi lec Apumtau Yesu lê di kitaa lec i bê Anutu i vông i vô nivîha lec. <sup>15</sup>Di he obêc vông i vin Anutu di kitaa ge od Apumtau Anutu obêc vông xomxo tige vô nivîha lec tii vac, di i nêl nipaên obêc yêp ge od Anutu obêc kitya vêl. <sup>16</sup>Mêgem xam nêl nêl nipaên kitong vômâ di xam toto kitaa vô Anutu lec lime, ên Anutu i vông he i vô nivîha lec. Ên kitaaên wê xomxo vông vinên vông ge xêkizêc tiyi wê ob vô nôn di ngidu xomxo xôn ge. <sup>17</sup>Xam xovô lec Ilaija lê. Ên Ilaija ge xomxo tiyi xocbê il ga, lêcom kitaa xêkizêc vô Anutu ên nêbê lun i nux, mêgem lun nux tiyi kliskas yon di dentuc vigê vilu di sec ti. <sup>18</sup>Nang dêc kitaa nang nêbê lun i val, om lun val mêd yaên tyip mi vô nôn.

### **Il ob vô il vêl ên môp nipaên**

<sup>19</sup>Xam lige, xam lime ti obêc sea xolac nôn di la vac môp nipaên, lêc li ngwe obêc didii i lôm vac nivîha ge, <sup>20</sup>od xam xovô bêga bê xomxo ti obêc vô li ngwe vêl ên môp nipaên ge, od tiyi xocbê vô li tige vêl ên wê ob yib mi la vac nipaên ge, di Anutu ob kitya i nêl nipaên toto ge vêl.